

*Nunarput isumaqatigiissummut ilaatinneqariinngippat ILO-mi isumaqatigiissutip 94-ip akuerineqarnissaa siunertaralugu naalagaaffimmut saaffiginninnissamut Naalakkersuisut peqquneqarnissaannik Inatsisartut aalajangiiffigisassaattut siunnersuut
(Inatsisartunut ilaasortaq Naaja Nathanielsen, Inuit Ataqatigiit)*

pillugu

Inuussutissarsiornermut Ataatsimiititaliap

ISUMALIUTISSIISSUTAA

Siunnersuutip aappassaaneerineqarnissaanut saqqummiunneqartoq

Siunnersuummik suliarinninnermini Inuussutissarsiornermut Ataatsimiititaliap ukuningga inuttaqarpoq:

Inatsisartunut ilaasortaq Naaja Nathanielsen, Inuit Ataqatigiit, siulittaasoq

Inatsisartunut ilaasortaq Andreas Uldum, Demokraatit, siulittaasup tullia

Inatsisartunut ilaasortaq Kim Kielsen, Siumut

Inatsisartunut ilaasortaq Akitsinnguaq Olsen, Siumut

Inatsisartunut ilaasortaq Knud Fleischer, Kattusseqatigiit Partiiat

Inatsisartunut ilaasortaq Aqqaluaq B. Egede, Inuit Ataqatigiit

Inatsisartunut ilaasortaq Karl Lyberth, Siumut

Inatsisartunut ilaasortaq Sivert K. Heilmann, Siumut, (sinniisussaq)

UKA 2012-imi siullermeerinerup kingorna siunnersuut ataatsimiititaliamit misissorneqarpoq matumuunalu Inatsisartut suliarinninnissaannut isumaliutini saqqummiullugit.

1. Siunnersuutip imarisaa siunertaalu

Kalaallit Nunaat isumaqatigiissummut ilaatinneqariinngippat ILO-p isumaqatigiissutaanut nr. 94-imut Kalaallit Nunaata akuersinissaa siunnersuuteqartup aalajangiiffigisassatut matuminnga siunnersuuteqarnermini kissaatigaa.

2. Inatsisartut siunnersuummik siullermeerinerat

Naalagaaffimmit akissutit erseqqinngitsut, taamaattumillu suliassa qarfimmi pissutsit assut nalorninartut Naalakkersuisut akissuteqaamminni allapput. Tamanna tunngavigalugu aalajangiiffigisassatut siunnersuutip siullermeerneqarnerani partiinit nalinginnaasumik

isumaqatigiissutigineqarpoq Kalaallit Nunaat ILO-mi isumaqatigiissummi nr. 94-imi ilaanersoq taamaannginnersorluunniit pillugu qulaajaasussamik nassuiaasiortoqartariaqartoq.

Siunnersuutip siullermeerneqarnerani allannguutissatut siunnersuutininik pingasunik, tamarmik taama kissaateqarnermik ersersitsisunik, saqqummiussisoqarpoq:

Naalakkersuisut allannguutissatut siunnersuutaat

ILO-mi isumaqatigiissutini Kalaallit Nunaata ilaalernissaanut, ilanngullugulu ILO-mi isumaqatigiissummi nr. 94-imut, malittarisassianik ingerlattakkanillu danskit naalakkersuisuilu siunissami ataatsimoorussamik paaseqatigiinnissaq siunertaralugu Naalakkersuisut UPA13-imut nassuiaammik suliaqarnissamik pisussaaffilernissaat pillugu Inatsisartut aalajangiussinissaannut siunnersuut.

Demokraatit allannguutissatut siunnersuutaa

ILO-mut isumaqatigiissut 94 pillugu nassuiaasiortoqarnissaanik Naalakkersuisut suliniuteqaqqullugit Inatsisartut aalajangiiffigisassaattut siunnersuut. Nassuiaammi Kalaallit Nunaata qanoq annertutigisumik isumaqatigiissummut pisortatigoortumik ilaatinneqarnersoq qanorlu tamanna ingerlanneqarnersoq qulaajaaffigineqassaaq. Inatsisartut isumaqatigiissut akueriniarlugu akueriniarnaguluunniit aalajangiissagaluarpata nassuiaammittaag aatsitassarsiorluni suliniutit ingerlareersut suliniutaasusassallu iluanni, tassunga ilanngullugit suliniutit annikitsut aammalu suliniutit annertuut, kingunerisassaannik qulaajaasoqassaaq. Nassuiaat ukiup ataatsip iluani naammassillugu suliarineqassaaq, Inatsisartut 2013-imi ukiakkut ataatsimiinnissaanni isumaqatigiinniutigineqartussatut piffissaagallartillugu nalunaarutigineqarniassamat.

Siunnersuutit allannguutissatut siunnersuutaa

ILO-mi isumaqatigiissummut 94-mut Kalaallit Nunaat ilanngutsinneqarpat sunniutissai pillugit Inatsisartut nalorninaatsumik pitsaanerpaamillu tunngaveqarlutik isummernissaat siunertaralugu Naalakkersuisut UPA 2013-imut nalunaarusioqqullugit peqquneqarnissaannik Inatsisartut aalajangiiffigisassaattut siunnersuut.

3. Ataatsimiititaliap siunnersuummik suliarinninnera

ILO-mi isumaqatigiissummut nr. 94-imut tunngatillugu nunatta inissisimanerata erseqqinnerusumik paasineqarnissaa partiinit Naalakkersuisunillu tapersersorneqarluartoq ataatsimiititaliamit oqaatigineqassaaq.

Siunnersuutip siullermeerneqarnerani allannguutissatut siunnersuutininik pingasunik saqqummiussisoqarpoq. Siunnersuutilli taakku arlaannaalluunniit taama iluseqartillugu ataatsimiititaliamit *tamakkiisumik* taperserneqarsinnaasimangilaq. Taamaattumillu

allannguutissatut siunnersuummik nammineq saqqummiussinissani Inuussutissarsiornermut Ataatsimiititaliap pisariaqartissimavaa. Allannguutissatut siunnersuutimi oqaasertalersorneqarnerani Demokraatit, siullermeerinninnermi allannguutissatut siunnersuutitut saqqummiussaata aallaavigineqassasoq ataatsimiititaliap tallimannornermi ulloq 26. oktober ataatsimiinnermini aalajangiuppaa, tassanili allaanerussutaassalluni nassuiaatip Inatsisartut upernaakkut ataatsimiinnissaanni aggersumi Inatsisartunit suliarineqarsinnaanissaa.

Tamanna tunngavigalugu Demokraatit allannguutissatut siunnersuutit tunuartinnissaa aalajangiussimavaat, tassa partiip ataatsimiititaliap allannguutissatut siunnersuutaa tapersermagu. Siumut Demokraatikkutuulli allannguutissatut siunnersuutertik tunuartikkusussimavaat Inuussutissarsiornermullu Ataatsimiititaliap allannguutissatut siunnersuutaa isumaqataaffigalugu.

4. Aningaasatigut kingunerisassat

Apeqquummik tamatuminnga misissuineq AC-eririk atuiffiussaasoq naatsorsuutigineqarpoq, suullu tamaasa ilanngullugit nassuiaasiorneq 250.000 kr.-it missaannik akeqartussatut ataatsimiititaliamit missingerneqarpoq. Aningaasat taakku Naalackersuisoqarfimmut atugassarititat iluini akilerneqarsinnaasut ataatsimiititaliamit naatsorsuutigineqarpoq.

5. Ataatsimiititaliap inassuteqaatai

Allannguutissatut siunnersuutitut ataasiakkaanut, taakku inersuarmi taasissutigineqarnissaanni tullerriarineq malillugu, inassuteqaatini ataatsimiititaliap saqqummiutissavai. Allannguutissatut siunnersuutit arlaata akuersissutigineqarnerata kingunerissavaa allannguutissatut siunnersuutit sinnerisa itigartinneqarnerat.

Nr. (1) Inuussutissarsiornermut Ataatsimiititaliap allannguutissatut siunnersuutaa:

ILO-mut isumaqatigiissut 94 pillugu nassuiaasiortoqarnissaanik Naalackersuisut suliniuteqaqqullugit Inatsisartut aalajangiiffigisassaattut siunnersuut. Kalaallit Nunaat isumaqatigiissummut ilaatinneqarnerasoq nassuiaammi qulaajaaffigineqassaaq. Inatsisartut isumaqatigiissut akueriniarlugu akueriniarnaguluunniit aalajangiissagaluarpata nassuiaammittaaq aatsitassarsiorluni suliniutit ingerlareersut suliniutaasussallu iluanni, tassunga ilanngullugit suliniutit annikitsut aammalu suliniutit annertuut, kingunerisassaannik qulaajaasoqassaaq. Nassuiaat ukiup affaata iluani naammassillugu suliarineqassaaq, **Inatsisartut 2013-imi upernaakkut ataatsimiinnissaanni** isumaqatigiinniutigineqartussatut piffissaagallartillugu nalunaarutigineqarniassamat.

Inuussutissarsiornermut Ataatsimiititaliap isumaqatigiittup allannguutissatut siunnersuut nr.


(1) **akuerisassannortipaa.**

Nr. (2) Naalackersuisut allannguutissatut siunnersuutaat:

ILO-mi isumaqatigiissutini Kalaallit Nunaata ilaalernissaanut, ilanngullugulu ILO-mi isumaqatigiissummi nr. 94-imut, malittarisassianik ingerlattakkanillu danskit naalackersuisuilu siunissami ataatsimoorussamik paaseqatigiinnissaq siunertaralugu Naalackersuisut UPA13-imut nassuiaammik suliaqarnissamik pisussaaffilernissaat pillugu Inatsisartut aalajangiussinissaannut siunnersuut

Inuussutissarsiornermut Ataatsimiititaliap **isumaqatigiittup** allannguutissatut siunnersuut nr. (2) **itigartinneqassasog** inassutigaa.

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappassaaniigassanngortippaa.





Siulittaasoq

